
BLACASSET.

SI m fai amors ab fizel cor amar
Que mil tans vuelh ses autre jauzimen
Esperar vos ab deziros turmen,
Bona dompna, cui ab fin cor tenc car,
Que d'autr' aver so qu'ieu de vos volria;
E plus no us quier mas que us plassa qu'ieu sia
Vostres, e si trop quier no m sia dans,
Si m forsa en re mo sen sobretalans.

Gentils dompna plazens, no us aus lauzar,
Ni faissonar vostra beutat plazen
Ni l'honrat, car, gentil captenemen
Ni 'l pretz que us te d'otra valor ses par;
Quar, s'ieu lauzan vostre gent cors, dizia
So qu'ieu per ver faissonar en poiria,
Sabriou tug de cui sui fis amans;
Per qu'ieu en sui de vos lauzar duptans.

S'aissi us auzes, dompna, merce clamar
Cum vos dezir ab car voler temen,
Ieu fora ricx; mas ar languisc viven,
Quar sol no m'aus quo us o diga pensar;
Mas si merces, que orguelh humilia,
Vostre gent cors, que m destrenh, destrenhia

Sivals d'aitan que us plagues mos enans,
For' ieu de joy als plus jauzens sobrans.

Ab tal voler fetz amors autreyar
Mon cor a vos cui dezir caramen
Que m fosson tug vostre plazer plazen,
Per qu' ieu volrai tos temps aitals estar;
Quar tan tenc car la vostra senhoria
Que, s' altra m des so qu'a vos non querria,
No s pogra en re cambiar mos talans,
Tant es mos cors d'onrat joy dezirans!

Tos temps vuelh mais doussamen merceyar
Ab humil cor tot vostre mandamen
Que d'autr' aver ab joy nulh jauzimen
Que nuls hom aus voler ni dezirar;
E ja de vos joys plazens datz no m sia,
Bona dompna, s' ieu d' altra lo prendia;
E s' aman muer, domna, sui merceyans,
Qu'en la mort prenc honor, sitot m' es dans.

Dona, si us platz que fin' amors m' aycia
Vos deziran, ja no us cugetz que m sia
Enuegz en re; ans, si us es plazers grans,
Serai tos temps de ma mort dezirans.